

Koko Moabelo o amogela Mohlagase wa go se lefelwe

Lapa la Koko Christina Moabelo le be le thabile ka kudu, ge Masepala wa Aganang o ba etela letšatšing la 8 February 2016 go ya go keteka mengwaga ya gagwe ye 103. Se se diregile motseng wa Madietane kua Ga-Matlala. Masepala wa Aganang o hlathile Koko Moabelo goba yo mongwe wa bao ba swanelago go amogela mohlagase wa go se lefelwe ka temogo ya mohlako woo ba lapa la gagwe ba lego ka gare ga ona. Koko Moabelo yoo go ya ka pukwana ya gagwe ya boitsebišo e šupago gore o na le mengwaga ye 83, o na le bana ba 6 gomme ba 3 ba hloketše. Ga bjalo o dula le morwediágwe yoo a sego a itekanela morago ga go hlaselwa ke bolwetši bja Stroke mengwageng ye 6 ya go feta.

Maloko a Ward Committee ya Masepala a kgonne go hlatha lapa la Koko Moabelo leo le iphedišago fela ka tšhelete ya mphiwa fela wa gagwe le morwediágwe. Morwediágwe o na le bana ba bararo. Meyara wa Aganang Cllr, Maria Mokobodi o be a farafarilwe ke Spikara Cllr, Masepela Dikgale, Sefepi-Segolo Malesela Teffo, le maloko a Khudutha-maga ya Masepala ebago Cllr Choene Mothotse(Technical Services) le Cllr. Koena Mahoai(Special Focus) le Mokhanselara Stephen Phaka. Meyara o bontšhitše gore Masepala ke kgale o šoma le ditšhaba e bile o ikemišeditše go tšwela pele go netefatša gore o šomela badudi ba Aganang ka bo tswerere. O gateletše gore ke maikemišetšo a mmušo go netefatša gore batho ka moka bao ba nalego maswanedi ba hwetša ditirelo tše ba di hloketšo tša motheo.

“Masepala o na le lenaneo la Free Basic Services, leo le nepilego go abela badudi ba rena bao ba itlhokelago ditirelo tša motheo ntle le tefo. Lenaneo le le akaretša Mohlagase, Meetse le Alternative Energy. Badudi ka moka bao ba lego ka gare ga lenaneo la Masepala la Bahloki (indigent register), ba holwa ka ditirelo tše tša motheo,”

Meyara o tšwetše pele go leboga ba lapa la Koko Moabelo goba ba mohlokometše gabotse go fihlela a fihla mengwageng ye a lego go yona ye 103. O ipileditše go batšofadi ba bangwe go tšwelapele go itlhokomela le go itšhidolla go netefatša gore mebele ya bona ga e ganelele ke malwetši.

Koko Moabelo le ba lapa la gagwe ba tla hwetša mohlagase wa go se lefelwe kgwedi ka kgwedi go tloga kgwedeng ya March 2016. Tokene ya mathomo ya go gotetša mohlagase woo wa go se lefelwe e dirilwe ke Meyara Mokobodi ka bo yena. Mmoleledi wa ba lapa Herry Manamela o re ba thabela go bona mmušo o ithwele go ba tlišetša ditirelo.

“Lehono re bona ka a rena mahlo gore mmušo wa Aganang o šomela setšhaba, re ipiletša go Meyara go tšwela pele go šomela badudi, e seke ya ba ka mo gagabo rena feela”